



STINAPA TA INFORMA

BONEIRU LO BIRA UN MUNISIPIO TROPICAL DI BERDAT?

Sea nos gusta òf laga, turismo ta e motor di ekonomia boneriano. Kresementu ekonómiko ta perkurá ku tin trabou i bienestar pa su habitantenan. Pero Boneiru no ke kresementu 'a todo kosto'. E lema pa desaroyo di nos isla ta 'kresementu ku mantenshon di nos kultura i naturalesa'. Especialmente e manera ku a manehá nos naturalesa - tantu riba komo bou di awa - pa hopi aña kaba, a duna Boneiru un nòmber sólido komo 'Isla di Naturalesa'. E reputashon ei dia pa dia ta bira mas importante. Sigur den Karibe kaminda tur e islanan ta kompetí pa trese turista pa nan mes isla. Ora ku bo ta na Kòrsou, bo ta ripará mesora ku e isla ei parse ta mas bèrdè ku Boneiru. Tin mas bèrdè públiko kant'i kaminda, i mas bèrdè rònt di e kasnan i ofisinnan. Esei ta parsialmente pa motibu ku Kòrsou tin e bentaha ku e awa den suela tin un mihó kalidat si komparé ku Boneiru. E awa ta ménos salu ku akinan. Pa via di posnan ta usa e awa di den suela pa muha mata i palu. Pasobra meskos ku na Boneiru, ta tiki awa ta kai na Kòrsou. Ta solamente e palunan krioyo por sobreviví ku e kantidat limitá di áwaseru ku ta kai pa aña. Na Boneiru e awa den suela ta brak, i ta tiki palu por ku e tipo di awa ei. P'esei nos ta dependé di awa di 'septic tank', renbak, òf - pero esei ta hopi karu - awa di kranchi. P'esei tambe ta komprendibel ku entrada di airopuerto di Boneiru no tin pal'i koko grandi manera na Hato na Kòrsou. LVV tin intenshon si pa planta mas mata kant'i kamindanan grandi na Boneiru. Pero tin un reto grandi mas pa gobièrnu di Boneiru. E aña aki Boneiru lo bira un 'Munisipio Tropical' di Hulanda. Ora ku bo ke traha un ofisina, hospital òf skol na Hulanda, bo ta obligá pa lei di utilisá un parti di e suma di konstrukshon pa 'bèrdè'. Kuantu mas bèrdè i mas atraktivo Boneiru lo por ta si gobièrnu ta hasi esfuerso pa introdusí e leinan ei mas lihé posibel aki na Boneiru tambe? E bèrdè èkstra ei lo solamente reforsá e reputashon di Boneiru komo 'Isla di Naturalesa' riba tèrmino mas largu. Esei ta importante pasobra nos ta biba di naturalesa. Naturalesa ta nos 'Motor Bèrdè' *Skirbí pa Trix van Bennekom, tradusí pa Marcel Nahr.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru